

小  
匏  
庵  
詩  
話

詩話之作始於歐陽子而司馬溫公又踵成之是大賢亦嘗爲此也近世詩話盛推隨園其大旨專以性靈爲主而不屑屑於分別唐宋誠爲通人之論然其流失在於纖佻率易不善學之百弊橫生矣余親家翁彭雪琴侍郎嘗力勸余作詩話謂君著書幾三百卷各種皆備惟欠說詩余因念比來江浙間士大夫鏤刻詩集者無慮數十家不余鄙棄刻成之後必以示余若就其中刺取以爲詩話未始不足成書而衰病相乘精神疲茶竟不能從事於此殊有臣精銷亡之歎嘉興吳牧騶觀察乃先兄福甯君同歲生也著有小宛庵詩集余旣爲序之矣又示余詩話十卷則自唐宋以來至本朝咸同間之詩皆有所採錄辨其源流論其工拙卓然有自得之見不苟爲去取詩中事實亦閒有考訂視隨園詩話多或不及精則過之矣惟余詩本不工

而君所採數首又皆少作不甚愜意末涓纖塊未足助嶽輸溟  
讀之轉不免汗下也光緒八年歲在壬午暮春三月曲園居士  
俞樾病起漫書

小苑庵詩話卷一

嘉興吳仰賢牧騶輯

韓子蒼謂作語不可太熟亦須令生謝山人謂作詩宜半生半熟查初白論詩謂須從熟處求生竹垞翁評胡奎虛白詩謂功力既深格調未免太熟誦之若古人集中所已有者觀數公之語不啻重規疊矩矣邵子湘長蘅論詩云夫詩藝也然要其至則天人兼焉有人而無天終身爲之未必其至也有天而無人率然至之未必其皆至也晉江丁雁水煒論詩云清而不已閒入於薄真而不已或至於率率與薄相乘漸且爲俚爲野又云詩貴合法然法勝則離詩貴近情然情勝則俚此皆折衷之論不膠已見者也

昔姜西溟嘗言我輩人人有集然詩傳與否未可知惟當連綴

姓名於集中幸有傳者卽附載之人亦因以顯夫以西漢之才之學自足千古尙不敢自必而冀倖於附載以傳甚矣沒世之名可貴也然使人無可傳徒以一時標榜掛名簡末則李志曹蜎厭厭無生氣反不如汪倫何遜一經名賢吟贈尙足動後人流連耳

昔毛大可作詩文必翻閱書籍嘗謂人曰動筆一次展卷一回則典故純熟日積月累自然博洽隨園詩云讀書不手記一過無分毫兩公皆博聞強識者所言如是足爲學者記誦之法吳江李玉洲中翰紹華平生爲張匠門何義門所知有貞一齋集十卷沈歸愚爲之序集後附論詩問答詩談雜錄頗有妙悟惜所作不如所言今節錄數則以爲作詩祕訣如云詩七絕須要有魂入神二字未形容其妙緣落筆朦朧縹緲其來無端其

去無際又云五言長排杜老將險韻留牘後幅故不免鋪綴香山將險韻參錯前後綽有餘裕又云放翁踵武香山益開淺直路徑又云咏物詩有兩法一將己身放頓在裏面一將己身站立在旁邊又云詩情要輒詩筆要健用實字要融冶用虛字要健鍊吟咏必先擇題運用先須選料四句兩聯必須情景互換作詩專尙錄事看詩專用出典慎勿以能詩許之

錢塘梁太傅文莊公在乾隆朝進和

御製詩每逢劇韻必蒙

嘉獎王蘭泉司寇異而叩之公曰昔蘇文忠公善次韻每遇艱險處恒以譬喻出之是以信手驅駕毫無窒碍吾窺得此祕故能游行自在天然湊泊耳按公揭明此訣津逮後學不少不特吟詩次韻爲然卽應試作律賦遇官韻難押處亦可以此法行之

唐韻集韻二十七刪有豚字呼闕切音懷注引說文二豕也漢  
皋詩話豚頑也劉夢得詩孟前膽不豚趙勰詩吞船酒膽豚朱  
竹垞詩集亦屢用之今韻本十五刪無此字韻府拾遺亦不收  
闕字出公羊傳韓詩儒門雖大啟姦首不敢闕范石湖平望詩  
寸碧闕高浪皺字韓詩爛漫堆眾皺又孟郊南城聯句紅皺曬  
檐瓦謂聚也貫休詩新蟬避栗皺李義山詩皺月覺魚來溫飛  
卿詩萍皺風來後馮延巳詞吹皺一池春水鴈字見嵇康與山  
濤書梁吳孜詩柳枝皆鴈燕王安石詩鴈汝以一句西歸瘦如  
腊又細浪鴈雪千娉婷韓駒詩弟妹乘羊車堂中走相鴈此皆  
俗字之有來歷者大抵愈用愈工

敖陶孫評杜工部詩如周公制作後世莫能擬議黃山谷贈東  
坡詩云吾詩如曹鄴淺陋不成邦公如大國楚吞五湖三江詩

至東坡豈特宋代無敵手自應橫絕古今然視工部則不免有王霸之分明馮元敏云皇甫子循如齊魯變可至道王元美若秦楚強遂稱王夫元美詩去蘇遠矣而與司直詩較論強弱正變之間則亦不可謂非知言也

治古文者或不工詩昔人以詆曾子固然子固實能詩惟國朝方望溪實非兼長竊謂古文家誌墓之作銘詞中有古奧者得楚騷樂府之遺非深於詩者不辦作古文而不達此境猶未爲至也

今人論詩見閻大語輒曰此近少陵見新穎語輒曰此近放翁不知大家詩集中無體不包二老同源異派杜不乏新穎處陸亦多闊大處也今戲列二詩於此不知論者又以爲何如少陵江邨云清江一曲抱村流長夏江邨事事幽自去自來梁上燕

相親相近水中鷗老妻畫紙爲棋局稚子敲鍼作釣鉤多病所  
須惟藥物微軀此外更何求放翁感憤云今皇神武是周寧誰  
賦南征北伐篇四海一家天歷數兩河百郡宋山川諸公尙守  
和親策志士虛捐少壯年京洛雪消春又動永昌陵上草芊芊  
以成語入律句而對仗天然不涉俳體者莫如陸放翁國家科  
第與風漢天下英雄惟使君吳師道丈夫不學曹孟德生子當  
如孫仲謀兩聯若東坡飲酒詩公特未知其趣耳臣今時復一  
中之妙則妙矣體類俳諧某氏未知明年在何處不可一日無  
此君只可用作楹聯施之官齋中有竹處最合此外用成語而  
稍增損其字者如朱翌云此時老子興不淺旦日將軍幸早臨  
又云何以報之青玉案我姑酌彼黃金罍黃字添出方秋崖云翁之  
樂者山林也客亦知夫水月乎王才臣云歸去來兮覺今是不

知我者謂何求潘倬云逝者如斯未嘗往後之視昔亦猶今放

翁云誰其云者兩黃鵠

其字添出

何以報之雙玉盤黃景昉云以吾

一日長乎爾如此三星粲者何皆詞工而趣未足又上句成語

對以昔人詩句如放翁云此生當着幾兩屐長日惟消一局棋

王漁洋云豈有酖人羊叔子從無悔過竇連波某氏云今夕只

可談風月故鄉無此好湖山亦自然湊泊若上四字用成語撰

下三字足之此體宋以來極多如黃山谷云不遑將母傷今日

無以爲家笑此生楊誠齋云聿來胥宇蟻移穴無以爲家燕入

秋曾幼度云不可以風霜後葉何傷於月雨餘雲唐庚云歲云

暮矣無雙燕我所思兮在五羊朱渙云閩人多矣數層塔開戶

視之三面山皆是又放翁云無端忤客坐狂耳甚欲讀書如懶

何此掉弄虚字故作頽放而已按史傳中尙有我醉欲眠君且

去長星勸汝一杯酒二句皆詩中好語惜未見有集對者

薤花倒影柳三變桂子天香張九成此宋人句法也實濫觴於晚唐溫飛卿云屏上樓臺陳後主鏡中金翠李夫人韓冬郎云壁石小松張水部暗山寒雨李將軍而溫韓又脫胎於老杜之清新庾開府俊逸鮑參軍一聯

杜詩卽從巴峽穿巫峽便下襄陽向洛陽十四字中嵌四地名不見板重由其用虛字轉掉也虞道園詩云安知蓬島非兜率不是匡廬定武夷則更靈動矣

杜牧詩高人以酒爲忙事浮世除詩盡強名常語耳楊誠齋詩云青天以水爲明鏡白鷺前身是釣師句更新警此善於脫胎者若李義山詩云死憶華亭聞鶴唳老憂王室泣銅駝沈彬云生希沙漠禽驕虜死奪河源答聖君放翁效之曰生擬入山隨

李麗死當穿塚近要離生希李廣名飛將死慕劉伶贈醉侯劉  
後邨云生慙族老名高尚死慕先賢諡醉吟此皆襲其調矣  
古人敬長之禮酌酒上壽非爲生日也生日祝嘏起於後代余  
觀唐人詩集中無題不備獨無祝嘏詞惟李郢有爲妻作生日  
寄意一律中云鴛鴦交頸期千歲琴瑟諧和願百年殊覺邨俗  
自宋以來此禮盛行施之達官居多連篇累牘附會獻諛眞惡  
趣也宋蜀僧居簡載葉正則語於詩集之端曰林下名作將以  
垂遠不可使千載後集中有上生日詩其見高矣

古人雖宗仰前哲決不肯蹈其臼科如少陵集中無古樂府而  
三吏三別卽效其體白香山秦中吟等篇製題仿杜而體又不  
類焉香山又有放言七律五首乃約步兵咏懷太冲咏史之旨  
而束之以律體雖云和元九實乃別調孤行此古人變化出奇

之法也後來竹垞以經解爲韻語趙甌北以史論爲韻語翁覃谿以致據金石爲韻語雖各逞所長要以古人無體不備不得不另闢町畦耳

彙閱沈歸愚明詩選序云宋詩近粗元詩近纖明詩其復古也竊謂此論過矣夫聚一代之才成一代之詩體製何所不備乃加以一字之貶盡行抹煞詎爲定評如虞楊范揭諸家胚胎三唐格律精細非明七子所能及學詩者若先從此數家入手可醫膚廓之病至其餘以綺麗爲工者乃學晚唐而過原不足法去取在我不必因噎而廢食也

集陶詩爲律始於王謔菴而黃子虛繼之近閱潘安何子壽太守咸宜鍊如意齋集陶組織頗工惟中有拗調與律未符茲擇其平仄相諧而入律者數聯如貧居依稼穡卧起弄書琴得懽

當作樂欲辨已忘言非爲卜其宅時還讀我書隻雞招近局斗  
酒聚比隣重離照南陸清節映西關涼風起將夕歸子命前途  
自我抱茲獨爲君作此詩余亦集有數聯如井竈有遺處林園  
無俗情佳人美清夜虛室有餘閒秉耒懽時務臨流別友生詩  
書敦夙好童孺縱行歌隻雞招近局來雁有餘聲揮杯勸孤影  
擁褐曝前軒

李太白詩旣死明月魄無復玻璃魂袁簡齋以玻璃魂爲不可  
解按魏顥李翰林集敘載白初娶許生子曰明月奴又合於魯  
一婦人生子曰玻璃

宋王觀國學林言杜子美壯游詩云斯文崔魏徒以我似班楊  
備員竊補袞憂憤心飛揚又夏日楊長甯宅送崔郎韋正字入  
京詩云醉酒楊雄宅均以揚雄之揚從木爲子美悞按楊德祖

荅臨淄侯牋曰修家子雪老不曉事則揚楊本一族杜詩自有所據非悞也

岑嘉州走馬川行起云君不見走馬川行雪海邊平沙莽莽黃入天行字是衍文此詩逐句用韻每三句一轉刪去行字則川邊天爲韻通體一格若加行字不辭甚矣乃各家選本從無爲之更正何耶

同年張惺陔啟辰言嘗閱元次山賊退示官吏詩有將家就魚麥句魚麥二字甚新然論文義二物不可連初疑是燕麥之類耳後校他本作魚藻方知亥豕之訛案此詩末四句云愚欲委符節引竿自刺船將家就魚藻歸老江湖邊本就水鄉說從藻字爲長

陸龜蒙論詩云峻嶮波濤穿穴險固囚鎖怪異破碎陣敵卒造

平澹而後已。又楊升菴堦戶錄載一則云知非詩未爲奇奇  
研昏練爽。憂魄淒肌。神而不知知而難狀。揮之八垠。卷之萬象。  
河渾沈清。放恣縱橫。濤怒霆蹴。掀釐斲鯨。鑿空鑿壁。錚水擲戟。  
鼓煦呵春。霞融露滴。隣女自嬾補袖而舞。絳色展空。續以麻紬。  
鼠革丁丁。炊之則穴。蟻聚汲汲。積而慣凸。上有日星。下有風雅。  
厯試自是非吾心也。首二句言自知非詩。乃是詩也。謂未爲奇  
乃是奇也。造語險怪。真能出奇於表聖詩品之外者。

去違知已。住違親。欲發羸蹠。進退頻。萬里家山。歸養志十年。門  
館受恩身。此晚唐人詩。隨園最愛誦之。以爲有真性情而忘其  
後兩聯。今補錄之。曰鶯聲厯厯。秦城曉柳色依依。灞水春明日  
藍田關外路。連天風雨一行人。係黃滔作題曰下第東歸留辭  
刑部鄭郎中。按滔字文江。莆田人。光化中。除四門博士。王審知

據有全閩而終其身爲節將者泊規正有力焉

義山古詩韓碑一首卽仿昌黎在集中另是一副筆墨次則偶成轉韻七十二句異曲同工但不如韓碑之整鍊耳餘皆香草閒情體類長吉或疑以義山之才如韓碑等篇何不多覲不知古人攻詩各就其性之所近併力專精不敢歧出卒乃自成一家人才不逮昔賢輒思無體不工無格不備徒捨一己之性情依傍揣摩得其糟粕而已

後來惟高古耶論詩必兼師眾長竹垞亦曰季迪之才始於兼故其

體備

昌黎詩泥盆淺小詎成池夜半青蛙聖得知唐詩金粉引之釋聖爲聽按泰山秦篆碑云皇帝躬聖史記作躬聽聖字从耳原該得聽義此三字或唐時方言如是風俗通聖者聲也聞聲知情故曰聖卽是此意

近世品酒貴陳而薄新唐代詩人則喜言新釀未嘗以陳釀爲珍或言老嫩如劉長卿云酒香開甕老少陵云小驛香醪嫩是也然亦不以此定優劣至樽酒家貧祇舊醕若舊醕不足以供客而自爲解慙者何古今人嗜好之不同耶

仁和趙松谷殿成箋注王右丞集義例矜嚴詳簡有法善本也然右丞深耽禪悅博覽竺經其引用之語誠有不易搜討者如卷二贈裴迪詩云不見相句不相見來久句日日泉水頭常憶

同攜手攜手本同心復歎忽分矜相憶今如此相思深不深起二句只八字初閱不解箋注亦未及疑有脫悞後乃知語出維摩詰經維摩問文殊師利不來相而來不見相而見文殊師利答云若來已更不來若去已更不去按一切經音義云相先羊反彼此二邊曰相然於詩中兩相字仍費索解當質之熟精內

典者

王右丞之陷賊與鄭虔不同少陵詩於王則云一病緣明主三年獨此心於鄭則云反覆歸聖朝點染無蕩滌此史筆也然讀右丞謝除太子中允表涕泣引罪無諱無飾此又豈今人所能耶今節錄之略云臣聞食君之祿死君之難當逆胡干紀上皇出宮臣進不得從行退不能自殺情雖可察罪不容誅又云仍開祝網之恩免臣戮鼓之戮投書削罪端衽立朝穢汗殘骸死滅餘氣伏謁明主豈不自愧於心仰廁羣臣亦復何施其面跼天內省無地自容且政化之源刑賞爲急陷身凶虜尙沐官榮陳力興王將何寵異又云朝容罪人食祿必招屈法之嫌臣得奉佛報恩自寬不死之痛

王孟並稱而兩人襟懷不同孟云北闕休上書南山歸敝廬不

才明主棄多病故人疎看他何等激昂王云溱園非傲吏自缺  
經世具偶寄一微官婆娑數株樹看他何等閒淡

太白詩落日懸春愁懸字下得空靈少陵詩暝色赴春愁赴字  
下得沈着句法不同各極其妙

唐人詩中好用走字如太白驅山走海置眼前又黃河落天走  
東海少陵詩江聲走白沙皆雄壯語也賈長江走月逆行雲韓  
昌黎卷卷落地葉隨風走前軒皆峭刻語也至李昌谷飛香走  
紅滿天春則愈奇矣

初盛唐七律中二聯皆對仗嚴整寫景而情寓其中至老杜而  
體格大備於走馬流水對外有白描一格如舊來好事今能否  
老去新詩誰與傳更期後會知何地忽漫相逢是別筵至東閣  
官梅堂前撲棗兩首中四句疊用虛字一氣旋折實爲宋代詩

派所從出又有似對非對一格如伯仲之間見伊呂指揮若定  
失蕭曹酒債尋常行處有人生七十古來稀宋人仿之更揚其  
波如東坡云汝輩何曾堪一笑我儕相對復三人古來重九皆  
如此別後西湖付與誰山谷云舞陽去葉纔百里賤子與公皆  
少年蘇叔黨云一天如許皆明月二客所需惟濁醪

老杜律詩句法有實眼虛眼之分實眼爲一句之骨虛眼乃一  
句之筋如江山有巴蜀棟宇自齊梁蟻浮仍臘味鷗泛已春聲  
江山且相見戎馬未安居入天猶石色穿水忽雲根皆虛眼也  
然此法不宜施之七言恐其句弱而調瘖耳元戴帥初詩云登  
塹水溫初待藻粉牆風細欲梨花六橋水煖初楊柳三竺山深  
未杜鵑此似詩餘中偶句非七律正則也

瘦硬通神少陵之評書也而東坡駁之後人幾疑公非深於書

者然聞三川驛有石刻杜少陵長天夜散千山月遠水霞收萬里雲之句其真蹟也東武劉季夏元化嘗親訪之在河濱嵌巖間十四字苔蘚剝蝕歷代遞相鐫剔雖失原形猶有古意字勢甚遒勁云劉係萬歷間孝廉善草書其所賞鑒定不謬未知石刻今尙存否

三川驛今在陝西延安府鄜州

香山律詩句法多新狃如琴書酒伴皆拋我雪月花時最憶君綠浪東西南北水紅欄三百九十橋榮先生老何妨樂楚接與歌未必狂皆是又其把十千沽一斗相逢七十欠三年一聯內用數目字凡六句法亦奇但十字犯複張祐有賀知章口徒勞說孟浩然身更不疑句卽效榮先生老一聯句法也

律詩中鍊字須下得自然不必好奇如耿湣詩云潮聲偏懼初來客海味惟甘久住人懼字甘字鍊得最的客是初來故聞潮

聲而懼人是久住故對海味而甘一句中上下自相呼應又於懼字上加偏字言久住人不懼也於甘字上加惟字言初來客不甘也兩句中上下又互相呼應且不言客懼潮聲而云潮聲懼客不言人甘海味而云海味甘人是力避庸熟處唐人句法似此者多舉一聯餘可類推

李義山咏柳云爲有橋邊拂面香何曾自敢占流光後庭玉樹承恩澤不信年華有斷腸金檜門德瑛郊西柳枝云西直門邊柳萬枝含烟帶露拂旌旗長是至尊臨幸地世間離別不曾知二詩風調相似

陶九成輟耕錄謂元代海運糧儲自朱清張瑄始古來未嘗有此非也杜工部出塞詩云漁洋豪俠地擊鼓吹笙竽雲帆轉遼海粳稻來東吳又昔游詩云幽燕盛用武供給亦勞哉吳門轉

粟帛泛海陵蓬萊似以南方粟米供給北方者唐時已然大約  
明以前北方水利雖講產米無多一遇用兵不能不仰給於南  
方之轉運耳

李義山云看山對酒君思我聽鼓離城我憶君李羣玉云正穿  
屈曲崎嶇路又聽鈎輦格磔聲金地藏云愛向竹欄騎竹馬懶  
於金地聚金沙陸放翁云喚船野渡逢迎雪攜酒溪頭領略梅  
楊誠齋云鷗邊野水水邊屋城外平林林外山元葉茵云有水  
可漁田可稼卽松而徑竹而門王次回云見說人歸歸雁後那  
堪淚落落花前近潘功甫云石湖白石平分宋山谷遺山割據  
唐此種句法皆由獨造

余初學詩從王谿生入手每一握管不離詞藻童而習之至老  
未能擺脫也然義山實有白描勝境如咏蟬云五更疎欲斷一

樹碧無情咏柳云橋迴行欲斷隄遠意相隨李花云自明無月  
夜強笑欲風天落花云高閣客竟去小園花亂飛樂遊原云夕  
陽無限好只是近黃昏卽日云重吟細把真無奈已落猶開未  
放愁復至裴明府所居云求之流輩豈易得行矣關山方獨吟  
數聯皆不著一字儘得風流然余尤極喜鄠杜馬上念漢書一  
首世上蒼龍種人間武帝孫小來惟射臘興罷得乾坤渭水天  
開苑咸陽地獻原英靈殊未已于傳漸華軒此詩興罷得乾坤  
五字化工之筆足傲老杜末言宣帝貴許史啟成帝之任外戚  
延及哀平委政王莽儼然史筆千餘年來惟山谷賞之而選家  
鮮錄此何也

唐彥謙咏仲山

漢高祖兄劉仲所葬

詩云長陵亦是閒邱壘異日誰知與

仲多

漢書高祖置酒爲太上皇壽日始大人以臣無賴不能治產業不如仲力今與仲孰多

高青邱咏短

簿祠云不能復使桓公怒莫怪年來祭客稀二詩語含輕薄機  
調略同而高尤有餘味

咏花詩刻畫顏色易落下乘惟唐賢最工此體如裴士淹咏白  
牡丹云別有玉盤承露冷無人起向月中看此烘託之法也薛  
能咏黃蜀葵云記得玉人初病起道家裝束壓襖時此比喻之  
體也陸魯望咏白蓮花云無情有恨何人覺月曉風清欲墮時  
此傳神之筆也白樂天咏白牡丹云應似東宮白贊善被人還  
喚作朝官則現身說法自寫寄託後操觚家大率不能脫此諸  
窠臼喜塗澤者每用紫玉綠珠絳仙息夫人等字以爲效廣平  
之咏梅花其實皆筌蹄也王漁洋咏白蓮花云香來月白風清  
裏花放鼓祠水驛前不脫不粘最爲高致金匱孫平叔咏綠牡  
丹云千葉相扶不辨花此句不用渲染自然移置他花不得然

亦意盡句中不若王又曾咏白蓮花云莫怪花容淨似雪看花人亦鬢成絲洗盡鉛華遂推絕唱

詩貴含蓄亦有不嫌說盡者文通別賦惟曰銷魂而義山詩云人世死前惟有別又云遠別長於死言別者無以加矣一將功成萬骨枯此苦語也而于濱詩云赤肉痛金創他人成衛霍以死者之無知不若生者之相形增痛此亦用加倍寫法

唐劉言史觀緹伎篇末云坐中亦有霑巾者曾見先皇初教時宋高菊淵題思陵御製墨本詩云白髮內人和淚讀爲曾親見寫詩時二詩用意略同而高作尤含悽欲絕

元遺山譏秦少游有情芍藥一聯爲女郎詩以其緣情而綺靡耳余觀唐人七律中如白香山云還似往年春氣味不宜今日病心情劉兼云處處落花春寂寂時時中酒病厭厭亦皆女郎

詩也

昔人論唐賢五律以晚唐馬戴猿啼洞庭樹人在木蘭舟一聯爲極則蓋兩句各自爲景對法靈變連而讀之神味愈出所以爲佳晚唐詩中此類尙多如崔塗亂山殘雪夜孤燭異鄉人司空曙雨中黃葉樹燈下白頭人同一標格但不如馬之天然秀麗不露感傷痕迹耳若戴叔倫除夕詩一年將盡夜萬里未歸人黯然銷魂幾令客中不忍卒讀然此併十字爲句能合不能分其句法本於王維之五湖三畝宅萬里一歸人而王句卻分開得

洪北江曰應制應試皆例用八韻詩八韻詩於諸體中又若別成一格有作家而不能爲八韻詩者有八韻工而實非作者者持論固當然余謂作家而不能爲八韻者特未曾措意耳非作

家而能爲試帖詩者工則有之精則未也後世八股文不得附於古文而唐人試律皆入全集固不得歧而二之善夫王芭孫之言曰講試帖者皆謂與他詩異予以爲與他詩全且必他詩悉工而後試帖可工必有韓杜百韻之風力而後有沈宋八韻之精能立論如此未免聽者意懾然芭孫固各體皆工而肆其餘力以求工於試帖者也甘苦獨得之言宜其剴切余又謂欲工試帖須先工古今體欲工古今體須先工古文蓋長篇古今體詩不特排比鋪張而已其敘次變化消納剪裁若神明於龍門之筆不更綽有餘地耶

咏古詩插入已身便見活動如溫飛卿過陳琳墓云詞客有靈應識我霸才無主始憐君後來查初白拂水山莊詩云生不並時憐我晚死無他恨惜公遲卽仿其意

古者以民爲兵民苦徵調不苦兵之病民也後世兵與民分兵不足又佐之以召募應募者皆無賴子弟於是民有畏兵甚於畏賊者嘗讀唐杜荀鶴旅泊遇郡中亂詩云握手相看誰敢言軍家刀劍在腰邊徧搜寶貨無藏處亂殺平人不怕天古寺拆爲修寨木荒墳掘作登城磚郡侯逐去渾閒事正是鑿輿幸蜀年此詩紀亂軍之害可謂盡言無隱矣以予在滇中所見練勇之橫尙有甚於此者

貓衝官道走狗觸店門開水牛浮鼻渡沙鳥點頭行此皆唐人句尤西堂摘以爲警警者也然水牛浮鼻近日已經習用而西堂晚年所作詩云園丁剝得青青豆厨子烹來白白魚雖青青白白脫胎杜詩而體類打油何嘗不蹈前弊耶

太白詩云魏帝營八極蟻觀一禰衡黃祖斗筲人殺之受惡名

自來解者俱謂魏帝觀禰衡猶一蟻耳故不介意李榕門獨譏其揚曹抑黃爲誤解而謂操營八極以蟻觀之者惟一禰衡必如此解方有着落與營字亦有針對余謂此說是也以八極之營作蟻營窟穴看極寫禰之倨傲正爲下文寡識冒天刑句張本若如俗解則操當日尊如獻帝伏后亦以蟻觀之何獨一禰衡耶臨洮吳鎮鵬鷗洲詩云建安士氣盡焉可無禰衡螻蟻視曹瞞詎知江夏名深得此解

杜拾遺踪跡在吳地者甚少惟壯游詩中有云嵯峨閬門北清廟映迴塘每趨吳泰伯撫事淚浪浪夫曰每趨蓋屢游矣肅宗徙上皇於西內父子之間有爭心焉愧讓王多矣撫事云云殆謂此歟今至德廟在城內近經吳中丞元炳重修輪奐一新若

有好事者仿公安山館杜息亭故事於廟中規隙地築數椽顏

曰杜亭以爲游人流連憑弔之所亦佳話也

韓退之和歸工部送僧約云汝旣出家還擾擾何人更得死前  
休杜荀鶴秋宿臨江驛云舉世盡從愁裏老誰人肯向死前休  
天下只有此兩種人一是不得休一是不肯休不得休只是壺  
於世故不肯休則甘心爲形役矣脫此兩縛方得大自在

唐史稱高適夫年五十始爲詩此語未確達夫詩有曰二十解  
書劍西游長安城又曰百年將半仕三已五畝就荒天一涯曰  
將半猶未至五十也曰三已則已久歷仕途矣薛用弱集異記  
中載旗亭畫壁一事則曰開元中詩人王昌齡高適王之渙齊  
名時風塵未偶而游處略同云云然達夫開篋淚霑臆一絕已  
爲優伶所唱其爲少作無疑又傳稱達夫少落魄不治生事客  
梁宋間今觀集中諸詩多客游時作殆早年已有詩名至五十

後更專精爲之耳

劉文房戲題贈二小男云未知門戶誰能主且免琴書別與人  
此暮年自慰之詞朱竹垞題盛叟生城詩云莫嫌丙舍少兒孫  
且免他時賣松柏此從劉句下一轉語鶴江無嗣故云然亦昌  
黎慰東野喪子詩意也

李義山詩夕陽無限好只是近黃昏宋程伯子詩未須愁日暮  
天際是輕陰兩人身世所遭不同故其咏懷寄托亦異義山以  
會昌二年釋褐在甘露之變後歷武宣二主僅稱小康而大勢  
已去矣伯子生神宗全盛之日使無荆舒之蒙蔽則政教昌明  
未可量也寥寥十字兩朝興廢之迹寓焉此與范文正高青邱  
之賦卓筆峯全孰謂詩人吟風嘲月無當於輶軒之採乎  
滇蜀黔三省毗連而風氣各異大抵滇不如蜀黔更不如滇唐

之黔州在今爲都勻府卽漢之黔中劉文房有送侯侍御赴黔  
中充判官詩云地遠官無法山深俗豈瘠須令荒徼外亦解懼  
埋輪蓋以澄敘官方望之近時吳興郎蘇門祿辰黔中詠懷詩  
則云此間不合有貪官蓋甚言其地瘠民貧雖貪吏亦無所施  
其技耳然惟其瘠貧官斯土者率以誅求啟釁蓋以不瀉之俗  
而遇無法之官挺而走險由來久矣唐人送人之官詩多有爲  
言之義兼規諷不似今人一味頌禱也岑嘉州送張子尉南海  
云此鄉多寶玉慎勿厭清貧亦然

唐元貞五年李白子伯禽充嘉興監徐浦下場糴鹽官場界有  
蔡侍郎廟伯禽因謁廟顧見廟中有一神女甚美麗戲漉酒祝  
曰娶婦得如此足矣後數日正晝視事忽聞門外有車騎聲伯  
禽驚起具服迎入命酒餽祇敘而去後乃言蔡侍郎諭親事吾

已許之治家事別親黨數日而卒許通幽錄余戲作四律咏其

事曰李郎吏隱逐鴟夷徐浦場頭坐嘯時吳市偶棲仙尉跡青

谿舊奉小姑祠明璫翠羽驚相見菰秀蘭芳有所思願托微波

通一語未妨唐突到西施其一碧落曾聞沈侍郎密呼青鳥報

王昌瑤臺有約簫雙管塵世無情粟一囊曉夢俄然成蛺蝶仙

家亦是羨鴛鴦負鹽溪女相攜手看爾乘雲赴瑛鄉其二鴉繞

靈旌賽彼姝歲時簫鼓進吳舫雙聲譜出春風婢小字呼來明

月奴真使參軍配新婦不同河伯賺村巫杜家姨有傷心語夫

婿鬚鬚伍大夫其三阿娘去訪李騰空歸遇江心捉月翁天上

神仙皆眷屬生前詩酒本家風功名落魄邀山鬼香火因緣乞

社公惆悵詞人張祐子東瓜堰上泣途窮其四

唐末詩人明出處大義者司空表聖外推韓致堯謝山人謂僂

節行似陶淵明而詩綺麗蓋所養不及爾此非篤論也偃以天  
復元年入翰林其召對詩云坐久忽疑螭斗歸來兼恐海生  
桑如今冷笑東方朔惟用諛諂侍漢皇中秋禁直云長卿祇爲  
長門賦未識君臣際會難駕幸岐下云雨露涵濡三百載不知  
誰擬殺身酬愛君憂國情見乎辭偃固薄東方朔司馬長卿而  
不爲者香奩集之嫁名信矣

王介甫改杜詩暝色起春愁起字作赴字後人韙之杜又有游  
龍門奉先寺詩云天闕象緯逼雲卧衣裳冷介甫以闕卧字虛  
實不對改天闕爲天關悞矣雲卧本是實字觀太白贈楊鴻詩  
云雲卧留丹壑天書降紫泥自見

杜茶村云集杜詩古之人有爲之者王介甫集七言古爲十八  
拍文文山當顛沛奔迫之際輒集五言以見志君子高介甫之

才而悲文公之忠也。余按二公後集成古體者莫如竹垞翁。長安賣卜行及酬吳江顧處士兩篇皆七古。運用自如。直入化境。集成今體者較多。當推江都顧圖河五律十首亦入化境。與竹垞翁贈俞汝言移居八首異曲同工。然兵燹後曝書亭詩集尙多而雄雉齋詩流傳較少。今全錄之以厭眾目。養拙江湖外茅齋八九椽。喜無多屋宇。自有一山川。老樹空庭得疏籬。野蔓懸灌園。曾取適吾道。卜終焉。其文章一小技。心跡喜雙清。議論有餘地。波瀾獨老成。虹霓就掌握。冰雪淨聰明。佳士宜相識。驂騑顧主鳴。其誰是長年者。終朝有底忙。功名不早立。兒女忽成行。同調嗟誰惜。安貧亦士常。氣衝看劍匣。每夜吐光芒。其詩是吾家事。心從弱歲疲。得無中夜舞。少有外人知。野興每難盡。幽偏得自怡。數篇吟可老。步履過東籬。其羣書一萬卷。短褐更無營。

似欲忘飢渴真堪托死生在家常起早多病也身輕此意陶潛

解幽居不用名

其五

鹿門攜不遂吾道竟何之耕鑿安時論柴荆

學土宜理生那免俗造興莫過詩牢落乾坤大悲歌識者誰

簷影微微落江流泯泯清美花多映竹細雨更移櫓詞賦工何

益漁樵寄此生草書何太苦墨淡字欹傾

其七

有客雖安命幾時

懷抱寬人生半哀樂世事各艱難野樹欹還倚明霞高可餐僕

夫穿竹語每日報平安

其八

長日容杯酒浮生一病身田園須暫

住龍虎未宜馴開卷得佳句觀圖憶古人乾址萬里眼滄海闊

無津

其九

寂寞書齋裏釣鱸獨未眠論文或不愧把酒意茫然鵬

鵬乘時去雲泥相望懸斯人獨顛顛一擬問青天

其十

黃唐宮允香屑集集唐如無縫天衣非百衲之比可謂工矣

婁縣張幻花梁以宮允八十八生辰集少陵句得五律六首爲壽

並遵香屑例禁複題可謂見獵心喜忍俊不禁矣今摘其警句  
如青松寒不落天馬老能行耕鑿安時論樵蘇寄此生蛟龍得  
雲雨鵬鷃離風塵文章千古事時序百年心暗水流花徑荒鋤  
淨果林皆工切不落套幻花康熙五十二年進士爲得天尚書  
叔

小匏庵詩話卷二

嘉興吳仰賢牧騶輯

邵子擊壤集詩多涉理趣然有暮春吟一絕風神雋逸頗似唐賢詩曰林下居常睡起遲那堪車馬近來稀春深晝永簾垂地庭院無風花自飛又如美酒飲教微醉後好花看到半開時雨後靜觀山意思風前閒看月精神數聯俱佳

林光朝字謙之號艾軒莆田人宋史儒林有傳隱居通議載其答人問忠恕而已矣曰南人偏識務支奇滋味難言只自知剛被北人來借問香甜兩字且酬伊答人問仁者安仁曰千年古道萬年隄老特循循不解迷牧子不知何處去亂山荒草鷓鴣啼儒門語錄竟同禪偈則心學冥悟之弊也

東坡云作詩必此詩定非知詩人此言詩貴超脫當別有寄託

不取刻畫非不論何題概以籠統門面語爲高渾也而謝山人之言曰詩不可太切太切則流於宋矣此語殊有病夫桃李新陰在鯉庭一聯當時壓倒元白者徒以其切耳卽初盛唐詩亦豈泛而不切者然歷下諸公號稱復古實守此訣爲枕中祕而此老公然洩之足見其直宜其見擯於七子外也

東坡詩千山動鱗甲萬壑酣笙鏞造句奇偉得未曾有不知上句從杜詩石鯨鱗甲動秋風句化出下句從杜詩萬壑樹聲滿及疎松夾水奏笙簧句化出一入鍾鑪便成異樣精彩

烏程嚴海珊遂成有集蘇詩卅六首前十八首下第後十八首懷人一氣渾成語如已出茲擇其對偶工整可作楹帖者摘錄若干聯如失路今爲噲等伍着鞭從使祖生先半閱諸公坐廊廟試呼稚子整冠巾要知西掖承平事也著東坡病瘦身嶺上

疎星明煜煜。牕前微月照。汪汪誰憐寂寞高。常侍獨憶生平盛。  
孝章多事始知田舍好。思歸苦覺歲年長。空詠連珠吟疊壁。半  
紆春蚓縮秋蛇。平生寓物不留物。人事無涯生有涯。年拋造物  
甄陶外。笑說生平醉夢間。傳家各自聞詩禮。與子不妨中聖賢。  
數畝荒園留我住。半篙流水送君行。獨攜天上小團月。自撥牀  
頭一甕雲。試着芒屨穿犖确。故教鐵杖闢清堅。有魚無魚何足  
道。以馬喻馬亦成癡。時人盡恠蘇司業。後學過呼韓退之。嶺上  
晴雲披絮帽。山頭落日側金盆。少而寡欲顏常好。病不開堂道  
益尊。粗言細語都不擇。舊恨新愁只自知。

隨園不喜王荊公詩。遂謂荊公工於文而拙於詩。此一時興到  
語耳。荊公古詩瘦硬天成。得杜之骨。同時鮮與抗行。卽以近體  
論如青眼坐傾新歲酒。白頭追誦少年文。酒醒燈前猶是客。夢

回江北已經年已無船舫猶聞笛遠有樓臺祇見燈濕濕嶺雲  
生竹菌冥冥江雨熟楊梅晴日暖風生麥氣綠陰幽草勝花時  
春風日日吹香草山北山南路欲無等聯情景兼到饒有風神  
隨園尙不能有此自然也

易林云蝦蟆羣聚從天請雨請字奇絕黃山谷詩有春去不窺  
園黃鸝頗三請之句蓋脫胎於此云

苻離之潰敗兵數十萬勢成洶洶魏公在帳中鼡卧若不聞其  
子南軒誇爲心學歎其難能後世疑之余謂魏公之鼡卧必有  
所爲想亦是鎮定人心之法南軒不發明此意徒以心學譽其  
父使後來全無心肝者喪師辱國而不愧是誰之過歟懷甯陳  
變樓大令世鎔有苻離弔張魏公云半壁江山尙可爲中原從  
此絕旌旗卻將冠準鼡眠法用在華元棄甲時詩帶調侃所謂

嬉笑甚於怒罵也

楊誠齋詩集中有贈翦字道人詩序云道人取義山經年別遠公詩用青紙翦字作米元章字體逼真云云此技至今流傳但用泥金紙翦成兼及花草翎毛粘於黑色油紙扇儼如揮寫而成價亦甚廉知其所由來遠矣按周密志雅堂襍抄云向舊都天街有翦諸色花樣者極精妙隨所欲而成又中原有余敬之者每翦諸家書字皆專門其後忽有少年能於衣袖中翦字及花朵之類更精工又攷嚴州建德縣志林文耀字綱齋幼卽工書筆法道勁中年失明臨池之興終不能忘乃翦紙爲字勢飛動若龍蛇點畫不差毫髮室人裝潢成軸易薪米以自給人稱之曰林翦今之售於市者殆後人繼其業歟

楊誠齋詩集中又有謝丁端叔直閣惠永嘉縣研詩云贈我阿

凡非姓陶朱家居士漆園曹急呼陳玄道黑水花暈千層吹海  
濤按顧千里漆沙硯記云邗上盧君葵生以漆沙硯見惠且告  
余曰康熙丁酉春先大父於南城外買得一硯上有宋宣和內  
府製六字其形質類澄泥而絕輕入水不沈甚異之久後知其  
爲漆沙所成授工仿造旣竭心思始克盡善用之者咸謂得未  
曾有金冬心先生撰有銘云云今則揚州市上列肆燦陳形製  
方圓不一上下兩層均可磨墨以面爲蓋箴以螺蚶作種種人  
物花鳥狀價值不昂大抵踵事增華而堅緻則不如前也

唐人詩雖極牢騷不失常度宋人便有過火語如岑參詩云祇  
緣五斗米辜負一漁竿黃山谷則云可憐五斗米奪我一溪樂  
不知誰奪之耶雖奪我鳳凰池語出晉書荀勗然本發悲之詞  
耳兩詩有溫厲之別至蘇云道逢陽貨呼與言心知其非口諾

唯黃云平生白眼人今日折腰諸名士口角大略相全

明月照積雪謝靈運詩也以五字流傳天生佳句不可摹倣黃山谷衍之曰姮娥攜青女一笑粲萬瓦新巧而已卻無意義

放翁平易近人故晦庵旣愛其詩又謂其能太高迹太近恐爲有力者所牽挽南園記之作若預知之觀放翁詩云俗子俗到骨一揖已溷人丰裁何嘗不峻然宋代奸佞之臣卻多風雅不俗則文字牢籠最易入其彀中汪覺堂書南園記後云放翁心存克復欲獎借侂冑成此志耳原心之論不爲無見然終無解於遺議也

善化許雪門太守語余曰陸放翁詩篇篇可愛卻自云詩到無人愛處工蓋心儀此境而尙未造極者也詩到無人愛古今來惟陶淵明足以當之此論允矣然淵明之詩淡而彌旨驟看不

見可愛尋味久之但覺愛莫能釋所以爲工若作詩必求無人  
愛則土鼓蕢樗亦何足尙放翁又有詩云俗人猶愛未爲詩此  
語最確今放翁之詩雅俗通賞但俗人所愛皆非其至者耳  
馬蘭處處有之吾禾於二三月間采其苗淪食之略全野菜顧  
野菜入詩而馬蘭可食古來鮮咏及之惟高菊礪詩曰馬蘭旋  
摘和松鬻枸杞新生傍菊栽又曰屋角盡懸牛蒡菜籬根多發  
馬蘭花今人呼坐几曰發古與檉通晉書王獻之傳魏時淩雲  
殿榜未題匠人誤釘不可下使韋仲將懸檉書之是也發字亦  
鮮入詩者惟高菊礪行淮詩云老翁八十歲如絲手縛黃蘆作  
短籬勸客莫嘆無筵坐去年今日是流移

上有天堂下有蘇杭此諺語不知昉於何朝宋南渡時已有之  
劉改之西湖詩云天堂從此去眞箇說杭州後人更續之曰上

有甘肅下有地獄

陳宗之刊江湖集以譏訕朝廷忤史彌遠言者并劉潛夫梅詩論列二人皆坐罪詔禁士大夫作詩彌遠死時禁始解潛夫病後訪梅詩云夢得因桃卻左遷長源爲柳忤當權幸然不識桃并柳卻被梅花累十年此以雅事而墮惡趣者也紫桃軒雜綴云南京百司事簡若太常則尤閒寂先輩有爲是卿者終日酣眠坐嘯而已一日傳門柝甚急詢之乃宣州入遞公文因春多風固戶訴所供太廟梨花被風落盡至秋恐難結實求派他邑有司故爲申請也因成一絕云印牀高閣網塵沙日聽喧蜂兩度衙昨夜宣州文檄至又嫌多事管梨花此以俗事而饒逸趣者也合觀二事則文士流連光景不可不遭際盛時

潛夫言梅花累人然人亦累梅花後世士大夫好詠梅如張洽

元馮子振多至百首可云詞費至方虛谷賦梅花百詠以諷賈相見癸辛雜志此則梅花之厄也善夫高菊磻詩云自從和靖先生後閒說梅花不要詩

元張師廉憲詩云張侯生冀北關帝出河東關帝二字竟入詩中大奇且查後主景曜三年追諡關公曰壯穆侯見華陽國志而公之靈蹟自隋始顯歷宋元加封爲王至明萬曆十八年封協天護國忠義帝四十二年封三界伏魔大帝神威遠鎮天尊關聖帝君自是始相沿有關帝之稱師廉不應豫用後世事疑必元代先已封帝今不可攷矣

紀事詩故爲奇奧使人閱之不得其指歸此以艱深文其淺陋也惟愈淺陋愈古雅斯爲超詣孔雀東南飛尙矣在唐當推韓白兩家元揭曼碩有臨川女詩曰我本朱氏女住在臨川城家

世事趙氏業惟食農耕五歲父乃死天復令我盲莫知朝與昏  
所依母與兄母兄日困窮何以資我身一朝聞密言與盲出東  
門阿母送我出阿兄抱我行不見所向途但聞風雨聲行行五  
里餘忽有呼兄名兄乃棄我走客前撫我言我與趙世親復與  
汝居隣聞汝卽赴死扶服到河濱我身盡沾濡不復知我身汝  
但與我歸養汝不記年湮湮遵旋路咽咽還入城城中盡驚問  
戚促不能言望門喚易衣恐我身致患再呼我母來汝勿憂饑  
寒汝但與盲居保汝母女全我母爲之泣我隣爲之歎喜我生  
來歸疑我能再明況得與母居不異吾父存我今已十三溫飽  
兩無營我母幸康強不知兄何行我母本慈愛我兄亦艱勤所  
驅病與貧遂使移中情當日不知死今日豈料生我死何足憾  
我生何足榮所恨天地生不如主翁仁誰能爲此德婁公名起

華此事委瑣極矣如何敘次看他一一述諸盲女之口前後貫串有條不紊密言二句畧而不詳極合五歲女記憶恍惚情狀中乃因母而憶其父復回護其兄末乃結明婁公之盛德撰出一篇有關世道文字卻如曰話一般使不知古文法者搦筆擬之有此簡當否

昔馬伏波述弟少游之言千載後猶令人想見高尚之致夫使少游他無可稱則與老死鄉里作自了漢者何異此正以伏波將軍相形見奇耳吳江沈萬三有弟名貴見兄豪侈作詩諷之云錦衣肉食非爲福檀板金樽可罷休底事子孫長久計瓦盆春酒木棉裘後隱於終南不知所終此殆高於少游矣

昔人謂畫入神品逸品者以烟雲養其性情其人多壽如黃子久沈石田文徵仲王石谷諸人是也余謂詩主性靈凡神動天

隨專寫寄託者其人亦多享年大年如白樂天年七十五楊誠齋年八十三陸放翁范石湖年皆八十六我朝袁子才年八十二若夫抉摘刻畫露其情狀昔人比之暴天物故李長吉二十七而夭我朝黃仲則年止三十有五蓋怡神者益人勞神者賊人也雖然詩者易爲而難工者也有終身爲之而不工者有爲之卽工急於行世而自悔少作者若年不及中壽其詩卓然成家而傳於後世以予數之如謝宣遠年三十六王子安年二十八高季迪何大復年皆三十九高子業年三十七宗子相年三十歷代不過數人卽謂之享大年可也

虞道園題子昂長江疊嶂圖詩云昔者長江險能生白髮哀百年經濟盡一日畫圖開僧寺依稀在漁舟浩蕩回蕭條數根樹時有海潮來只四十字而大氣盤旋寄勝國無窮之感卽起趙

王孫於九原亦應泣下詩至此可云巨觀能嗣響者其漁洋題  
趙承旨畫羊七律一章乎

詠東坡詩須筆端有奇氣方稱元趙秉文題趙琳畫東坡石上  
以杖橫膝肩頭云廟堂竟何人此老乃石上盤礴藹古胸入此  
一藤枝擊去荆舒蠻扶來司馬相君看熊虎顏百獸不敢傍起  
二句直中肯綮以下自迎刃而解矣具此力量方能寫得坡公  
氣象出

明謝茂秦與成皋王傳易及子玄易論作詩有縮銀法因舉唐  
李建勳詩未有一夜夢不歸千里家兩句一意字繁辭拙能爲  
一句卽縮銀法也二人沈吟久之玄易得歸夢無虛夜五字傳  
易得夜夜鄉山夢寐中七字茂秦首肯曰一簡切一流暢余謂  
今人作詩能學此法研練之久自生妙悟眞詩家指南針也

明神廟時王文端以爭建儲去國至朱文恪掌大宗伯事章凡三十上得允竹垞贈王沙縣秦墳詩云先臣典禮日相國去官初各建留侯策同傳賈傳書此詩人闡揚先德之義也明鄭子升聞冊立皇太子喜而賦詩云九重原獨斷四皓本無功此詩人善則歸君之義也言各有當不嫌互異

吾邑南湖烟雨樓歷代名人題咏甚多志乘載明李攀龍七律一首中聯云江流欲動帆檣外山色遙分睥睨西按乍浦諸山在樓之東南尙可望見樓西山皆在百里外非目力所及至揚子錢塘兩江路隔數百里豈能於帆檣外窺見其渺茫可見七子派作詩不切情景徒好作闊大語而已惟錢文端詩云偏與客船留落日全收湖氣作秋陰及汪文柏櫓過惟聞曉裏聲李鄒齋四時都好更宜秋等句能爲斯樓寫照未許粗心人領取

也

有明一代詩人奮起於布衣者惟孫太初謝茂秦然隆萬間尙有俞山人羨長山人初名策字公臨後改名安期吳江人徙陽羨著有寥寥集四十卷嘗謂郭宏農有江賦而古來賦河者雖後漢應陽有靈河賦晉成公綬有大河賦然皆寥寥未備於是渡江浮淮周歷孟津砥柱積石諸勝迹作河賦一篇詳述源委剖析利害并折衷於古今來治河之異同有資宣防非徒鬪奇炫博已也詩雖講體格不乏緣情之作集中有昭涼詞百首兼擅王建宮詞羅虬比紅之勝昭涼者鄂渚麗倡籍隸楚宮嘗以雀角事大受摧辱者也山人眷之故寄吟咏余最愛其中一首云脉脉蘭心解自持向來小錯避人知偶拈舊事樽前戲忽地嗔生不語時真乃入神之筆又有樂府小詩如歡聞變歌云

信人嬉笑語疑儂有他向燈盡燭尙然無由應見諒懊惱曲云  
婦女無意智日望夫婿貴望得夫婿貴新人前門至東隣女云  
唐突東隣女輕翻引避身藏羞持慢掩留隙更窺人皆宛合齊  
梁間體裁

題畫詩以畫家自咏爲得天真由其心神相注機趣湊泊也吾  
里明李太僕竹嬾畫入神品惜流傳甚少其自題斷句雜見集  
中如題扇云此物偶然落君手蛟龍欲得須還之故人索我煙  
霞稅攬取秋光入硯池莫訝濕雲飛不起米家原自有晴山水  
煖江鄉魚布子泥香茅屋燕營巢木葉陰中聽鳥語荷花香裏  
下魚鉤江風醒酒具江月釣詩鉤舴艋無多大能容天地秋灘  
喧子魚上雨歇乳鳩唳盡日忙幽事蒲苗翦未齊又題蘭蓀云  
繡帶看垂地金釵笑挂冠題魯孔孫寫竹石云峒強風霜裏離

披烟草間卻如墨胎氏僵立首山顛題梅竹云雪後蜨情將試  
拍風迴鸞尾爲驅壓老松云皮香老龍骨針短定僧影曲竹云  
橫曳仙人綠玉杖倒披天女紫茸裘皆涉筆成趣姿態橫溢後  
茶板橋道人諸題咏參以諧諢視此有雅鄭之別

太樸韻語皆有雅人深致惜不得其全稿讀之茲從紫桃軒稊  
綴中摘取如雪中云雲來庭樹暗棲鴉鈴索無聲吏散衙獨立  
虛簷人不見自團殘雪嚙梅花夢中有作云南山有竹北潭有  
魚截斯長竿以釣沮洳沙瀨灑灑白鷺卻走烟銷霧空明月在  
手又夢中得句云嘯命猿侶身爲鳥賓宿豫章白珩行館云老  
樹西風驚鶴鶴壞牆陰雨繡龍蛇天目道中云溪流春淺鹿麋  
過山路雨晴栢栢香武林僧舍云林光翻草蝶腮影落松鼯武  
林大佛院倚醉閣題句云石開黃葉徑湖展白漚天江西雜詩

云空山黃葉雨。淺澗白沙流。寒山秋磬底。落葉夜燈前。青山高  
士榻。黃葉老僧家。又贈山中逸人。雜聯云。倚壁藤枝雲氣在。橫  
窗松影月明來。硯影晴雲連秀野。茶香春雪沸寒潮。花枝滴露  
濡毫彩。竹葉分香到酒杯。皆超脫秀麗絕去塵氛。

太僕又有兩硯銘甚佳。其一云。辛酉冬得一硯。質溫而澤。行墨  
無聲。三四前卻而濃。雲鬱然按其形模。真唐硯之佳者。以左足  
玷缺。遂賤值而售於余。余銘之曰。剖騰虹。則其足蕩奇。雲坦其  
腹。甯缺而礲礲。毋甯全而碌碌。序只數語。說硯之佳處。已盡。銘  
詞尤有生氣。其一云。壬戌冬孟得一蒼碧硯。大如胡餅。厚五分。  
池作偃月背。小篆半山齋。硯元豐辛卯八字。殆宋物也。銘曰。半  
山老人挾此硯。著字說竹嬾。攜以寫奇樹。俱不免橫生枝節。而  
竹嬾於文無害。此銘更奇特可喜。

元遺山賦雲巖石詩序云觀州倅武伯英詠燭剪刀有啼殘瘦  
玉蘭心吐蹴落春紅燕尾香之句盛爲時輩所稱太僕以爲上  
句無味因戲改之曰吞殘月魄囊顛動蹴落花鬚燕尾香勝原  
句多矣又改曰朱櫻顆坼金蟲墮絳樹花殘玉燕斜更工麗記  
得鄧綬筠制軍有味瓦歡壺一聯云饜腹飲河容一勺馬鬣行  
雨散千條彷彿近之

山谷詩云買魚穿柳聘衙蟬放翁詩云裹鹽迎得小狸奴至今  
人家乞貓者或以鹽或以糖遂成故事文衡山有一詩最佳云  
珍重從君乞小狸女郎先已辦瓊瑜自緣夜榻思高枕端要山  
齋護舊書遣聘自將鹽裹箬策勳莫道食無魚花陰滿地春堪  
戲正是蠶眠二月餘又有人咏貓限九韭酒韻者詩云貓兒似  
虎有八九愛食葷腥不食韭昨夜捕鼠太荒唐翻到床頭一瓶

酒收起甚

仁和孫之騷晴川著蟹錄四卷後錄三卷搜羅典故甚博兼及古今人詩詞中有徐青藤題畫蟹詩云十臍縛蘆大如箕送與酒人可百卮答一墨臍苦無詩欲拈俗話恐傷時西施秋水盼南威樊噲十萬匈奴師陸羽茶鐏三五枝末三句是隱語看汝橫行到幾時也惟恐傷時故以隱語出之此格奇而叛此詩青藤集中未載又題畫蟹云誰將畫蟹託題詩正是秋深稻熟時飽卻黃雲歸穴去付君甲冑欲何爲此刺武臣之惜死者又載唐子畏題畫詩云雪滿梁園飛鳥稀煖煖楸枰柴扉地爐溫卻松花酒剛是溪頭拾蟹歸

挽文丞相詩以徐威卿虞伯元兩作爲最其次則邊華泉花外子規燕市月水邊精衛浙江潮一聯亦擅勝場范陽鹿伯順先

生善繼亦有兩首次章云生祭洋洋炎午言間關何意歷朝昏  
莫將死着疑生着須信身存是國存箕訪九疇無損義周容二  
餓有餘恩斯人而外談非易勿借黃冠作便門雖純使議論而  
沈着痛快可當史評先生又有挽于忠肅詩云元老畫成經國  
計王人奪作上天梯可堪攘臂居奇貨遂使臨軒壞好題亦能  
道着痛癢有無欲齋詩鈔係成雲洞定本其詩一百五十九首  
多闕發忠義亦有清新秀麗之章不知明詩綜何以遺之

近從盛迦生表兄處假得明人詩選一冊不知何人編輯既無  
序文亦無卷目詩凡四十家皆在啟禎朝其人仕隱顯晦不一  
大率以忠烈節行著聞內有十餘家爲明詩綜所未錄亟登之  
桐鄉陳涵白刺史素崇禎甲戌進士有獄中除夕雨雪詩云  
此宵非我夕來日又他年又有俘臣字當作於鼎革後不知緣

何事羈繫後遇放以遺老終新秋夜泊借宿巨手明月樓主人在城賦此以當面云黃昏風浪繫扁舟竹裏雙扉分外幽不礙梁鴻常入市誰憐王粲其登樓啼鴉啞啞千林雨落葉蕭蕭一枕秋夢入沅湘章杜若烟波一望不勝愁巨手者秀水諸生吳統持也與妻項佩偕隱鴛湖

李繼貞字萍棧太倉人官侍郎有猛虎行云山深月黑風號林猛虎磨牙思噉人子何夜行攬其喉云家有吏夜守門追逋如火憂心焚雞豚鬻盡將兒孫不忍老年見生別甯折瘦骨爲虎吞同是猛虎此有冠有冠不可竄騶虞見之徒心酸同是猛虎此有翼有翼不可測狡狴見之亦變色行乎行乎擇害莫若輕倖脫虎口留餘生願充獵戶不汝撓擇害莫若輕一語足該泰山婦捕蛇說兩事讀此見明季催科之弊

章簡字羅源號次弓華亭人有悲燕城四章述甲申三月十九  
之變淒涼哀感接武遺山其後二首云靈物輪囷護九霄忽聞  
騎日火龍妖天孫漢水辭青殿王母雲鬟墮翠翹八駿千官悲  
穆滿三年四海哭唐堯羣疑眾難填胸飽一斛檳榔不可消  
廟鉞親推上相車半爲猿鶴半蟲沙鳳凰已去青桐樹翡翠爭  
簪白奈花東道羽書飛海岱北邙烽火掩雲霞碧鏤銀榜無消  
息莫羨生兒在帝家

顧紹芾字德父崑山上舍生詩氣息深厚各體俱工古詩如懊  
雪歌云萬樹翦雪花門前玉三尺雪亦解憎儂故沒歡來迹夜  
步句曲山中云萬松嘶天三峯秋大石如虎騎朱樓近體如客  
愁工伏枕木落善啼風高眠蕉葉綠靜坐薔花香看雨千溪白  
聞鐘一嶺青風雲羅肉食江海笑蓬心皆有奇氣

吳縣王山人名人鑑字德操詩甚古淡冬日閒居云忽忽寒光  
早。貧居水上邨。病疎當世事。拙負故人恩。黃葉深樵徑。荒烟澹  
華門。憑誰論出處。短褐信乾坤。

長洲劉元聲太學名應劉元博文學名廣俱能詩元聲有雪朝  
憶弟閩中云寒衾如鐵擁朝眠。念子征衣九月單。栢葉斟春何  
處酒。桃花迷客幾重天。無田卒歲西山垞。有夢還家萬里船。縱  
是途窮應慷慨。清狂知不受人憐。元博有古別離詩一首收云  
隣家女嫁征戍兒。寒砧夜夜啼相思。君身不向樓蘭去。空使頻  
年恨別離。以敘忠之思托之兒女言情別有思致

許德溥字元博如皋布衣慷慨勵風節甲申閩變拔劍斫地誓  
以身殉我朝定鼎雍髮令下上有老親迫之不從賦詩見志  
後因事收繫有臨刑詩云一念從君積已深。于今地下得相尋。

兒曹不必收遺骨。留觸人間起義心。所謂三軍之帥可奪匹夫之志。不可奪九死不移。亦可哀已。

江夏黃孝廉正色字美。中有官疑之吳幼曆。過訪山居詩云。牆低不蔽面。山居秋老。藤花覆有餘。憂世未成梅。福疏避人每。枉呂安車已催拙。爨先春稍旋取。疎習自網魚。杯斝數行還起立。滿天晴月獨卽墟。以上其九人錄其詩以存勝國遺老梗概。明袁崇煥之被誅。由吾朝用間所致。非其罪也。上元馬湘帆侍御沅弔崇煥墓詩云。生不如薊。選卒死不歸。東苑骨壤此長城。填一窟。燕市霜寒。秋草沒邊才慷慨。櫻邊烽督師入衛宜酬庸。十二當斬事豈同。惜哉擅殺毛文龍。論斷平允。當湖柯柯山先生宏祚明季諸生。勵氣節有九山草堂詩。詩格在虞山梅邨之間。其燕京金陵雜詩。黍離麥秀之感。溢於言外。

茲錄其古體悲平西一首云我所思兮乃在衡山之雲彼何人  
斯朝爲包胥暮爲伍員失一君得一君厥爲臣思爲君淮南野  
鬼哭孤墳寥寥數語三桂之罪狀已盡近體余山人一首蓋刺  
周公而作詩曰處士承聞少宦情暮年三徑有逢迎南橋茗具  
傳花樣北院歌樓列姓名猿鶴只愁小草出龍蛇常候少微傾  
不圖復有蘇張事漫道胸藏過甲兵自註東江事皆言繼儒授  
意閣臣錢某遂陰主袁議云

乍浦李天植字因仲崇禎癸酉舉人改名確字潛夫築蜃園以  
居甲申之變髭髮入陳山課蒙自給久之餓死年八十二沒後  
七十餘年鄞縣全祖望爲作蜃園先生神道表平生著述甚富  
今存者蜃園詩集而已丙戌除夕詩云誰遣梅花到葦門清尊  
相對坐黃昏傷心往事眞蕉夢老我餘生是菜根多病文園甯

事藥無家季布不妨髡年來豪氣消除盡好把楞嚴仔細論柯  
山先生經李孝廉墓詩云書著潛夫不下樓廿年苦節在龍湫  
蟻封有地埋王栢麥飯無兒酒到攸晚蕨香肥塵銼冷新蒲綠  
滿浦雲愁不知城郭今何代獨對南山黯素秋兩賢心跡相同  
讀其詩畧知梗概矣

隨園詩話言制藝工夫太深者有害於詩陳黃不過時文中之  
豪故又工詩金陳爲時文中之聖今詩無流傳按明詩綜中載  
正希先生五律一首余閱郭青螺黔志載陳大士五古兩章其  
曉行黎峨道中起聯云高霞飲朝氣水木澄空宇頗類康樂知  
大士亦非不能詩也正希先生又有石刻手書十四字云敢於  
世上明開眼肯向人間浪皺眉雖脫胎於邵康節而句自兀傲  
可喜又工畫有米元章研山圖爲南海吳竹香上舍奎光所藏

明人詩集開卷必羅列古樂府各題句摹字仿面目畧同吳次  
尾嘗引楚人江蓠蘿之說以譏之謂古詩所命題皆就其時事  
構詞因以名篇彼有其時有其事然後有其情有其詞我從而  
擬之非其時矣非其事矣情安從生至哉言乎惟陳元孝獨鹿  
堂集內自製歌行卻實具古樂府神理余最愛其繅絲歌一首  
云小蟲之大小指如君子之軀七尺餘鑊烹小蟲胡爲乎將以  
爲衣榮君軀君軀長君軀短小蟲之小繅有限中心抽盡君未  
暖短歌代哭使貪吏誦之能無忸怩

崇禎一朝流寇之禍始於元年之裁驛卒夫驛卒可裁也然以  
數百萬卒徒一旦失業散歸不特不爲之所也時又有稽核蘆  
政及泰山掛幡諸使沿途騷擾鞭撻誅求焉得不驅而爲盜乎  
明季諸臣高言經濟而處置無術卒至淪胥長洲徐九一汧有

驛歎篇中述父老之言云小人處窮閭不識堯舜面饗利卽有德唐虞非所羨此真通達治體之言也

錢虞山遭烏程齟齬於廷推之日忽奉嚴旨革職待罪作感恩述事詩二十首有云薄俗休官如物故畏途削跡當遷除可云達觀使虞山能守此言何至晚節不終進退失據抑忘卻下句記得上句必欲死中求活耶

勝國遺老雖終始全節然多與本朝貴人縞紵締交卽亭林梨洲亦不能免固以學問行誼相切磋非逐聲氣也南海岑高士霍山嘗以詩貽陳獨漉曰獨憐一代夷齊志錯認侯門是首陽何其激切如此按高士名徵甲申後棄諸生隱西樵山所交皆高僧野人故能言人所不能言

世俗所稱神童輒以有夙慧者當之此不過慧童耳聰明正直

之謂神若明季華亭之夏存古始足副是稱矣存古名完瀟小  
名端哥彝仲子十五從軍十七致命而所爲詩古文詞皆卓然  
老成合項橐汪錡爲一人直是東南間氣所鍾生才如此奇矣  
而造物之所以位置之者更奇天殆縱其奇以結勝國之局歟  
沈歸愚所選明詩別裁中錄詩四首皆五古氣息逼近漢魏然  
存古詩實無體不工律詩尤勝五律如哭所知云丞相門誰掃  
公孫閣不開白龍千古恨黃犢幾人哀江海猶生氣風塵未盡  
才靈旗排浩蕩毅魄獨歸來七律如野哭云雒下聲名並李膺  
龍門天半許誰登秋風零落三千客暮雨寒生十四陵霜帳盡  
連青鎖闥明駝先踏玉河冰魂飛故國知何處擊筑悲歌意不  
勝春興云上苑風飛柳絮縈朦朧烟樹鎖龍池北門年少承恩  
早西部名王出塞遲種就葡萄驕王勒吹殘篳篥醉金卮漢宮

舊事誰能記青塚春光又一時西華門與同難諸公待鞠云同  
舟今日半南冠魂斷雲山舊築壇仁壽鏡歸江月落景陽鐘動  
曉風寒誰將杯底銷秦獄卻向囊頭識漢官相對銀鐙趨右掖  
夢中猶作侍臣看

明季遺老能詩者多惜日就湮沒如錢塘潘雪帆有拜鵲堂詩  
四卷邗江田梅岑有埋照集二卷在有明諸家中當推作手雪  
帆名問奇入國朝後旅食淮上旋祝髮於天壽山後客死天  
甯寺楊州太守遜陽傅澤洪葬之平山堂取其集與梅岑詩合  
刻之在康熙乙亥年潘詩深厚蒼涼律體尤沈着如客武昌有  
感云漢時臺省工刀筆自壞長城國遂空四十餘年遺涕泪江  
湖多難想英雄六州鐵盡都歸錯三字冤成不論功昔使移山  
原有力書生莫便笑愚公此詩蓋用熊廷弼而作也論事有識

胸具史才天壽山云金粟堆寒石獸眠六龍腸斷草芊芊晚山  
躑躅開何處春社櫻桃罷幾年黃紙禁樵新約法白頭供掃舊  
中涓關情最是民間蠶昨日兒孫挂楮錢鼎湖之淚麥秀之歌  
有餘痛焉其他佳句五言如平原朝射雉古驛夜防蛇廟冷祠  
山鬼村喧逐野豬鳥跡書沙徧藤花借樹生雨逢黃葉苦風到  
白楊多殘兵分堡爨惡草占田生楊荒眠雨雪窗破漏星辰海  
風吹面黑山雨着衣潮竹涼魚就食池靜藕生花月當殘夜出  
霜挾敝裘飛到楚河魚賤過淮驛馬稀魚衝崩岸立草上斷槎  
生七言如明月到樓纔是夜桃花無水不成春斜闌野花城角  
路倒懸山果樹腰藤西陵舊路桃花雨南浦騷人夢秀天淚比  
桃花容易落夢如春酒最難醒諸聯皆不拘一格又樹老立饑  
鴉風汀立收荷饑禽立卧鐘三立字俱工鍊贈施將軍云中箭

歸來面不知。運典入化。

卷十一

七

梅岑名登其詩。清超俊拔。尤長五言。工於發端。破空而起。如皖上晤儼若曰。百戰逢君日。還疑是夢中。重晤繡楚云。與爾難言處。江山對酒。后秋夜同紀伯紫飲。妙光閣云。大漠不飛鳥。寒鐘時一撞。野望云。烽火迷歸路。高城晚更登。山寺對月喜。駢斯適至。云。月出洞庭白。空山忽到君。秋日過雍奴。祖明府云。小驛如村落。秋蟲白晝吟。曉發秦郵湖。云。榜人呼客起。殘月在湖濱。其聯語之可摘者。如山翠晴侵縣。江雲冷壓船。過橋高柳合。隔岸一峰晴。禿樹前朝塚。高花處土扉。芳草愁眉外。春江野哭中。塞風人面黑。沙跡馬蹄圓。山靜生孤磬。江空湧一燈。皆不事雕琢。七絕亦有風神。如寺樓晚望云。客子驚聞畫角哀。山樓欲下更裊裊。老僧指點蒼茫外。曾見先皇翠輦來。丁卯客都門。值初度。

示桃葉二子云百戰乾坤剩此身。今宵重對啟禎人。白頭紅燭  
千行淚與爾尊前話。甲申。

秦存古嘉銓西洞庭山人明季諸生有旣耕堂集二卷其落雲  
坡社集倣蘭亭詩意云漆園著齊物晉人蒙其皮清言雖疊疊  
大道或差池家繪老莊圖宦情日以滋爲清談諸君痛下針砭  
卻非深文刻筆

黔省在明正統間始行鄉試至明季科名特盛且多顯宦如何  
騰蛟楊文驄皆以舉人起家熊文燦馬士英田仰皆以進士出  
身此數人者雖薰蕕殊器然皆非庸流也明詩綜於黔詩錄謝  
三秀楊龍友二人謝有雪鴻詩楊有洵美堂集在當時亦皆作  
手迨入

國朝沐同文之化風氣日新沈歸愚選別裁集於黔省惟登周

漁璜宮詹起渭詩數首謂向日未聞詩人此由採訪不廣耳  
明張二水瑞圖書法奇偉恣肆雄視一時卒以書魏璫生祠匾  
見擯清流黃石齋詩云其人姑勿論其字天下奇愛之抑惜之  
也長洲陳明卿仁錫以不草忠賢鐵券幾蹈不測毅然勿回其  
丙寅放逐漫記詩云縱然刀鋸斷吾腕不作天邊一紙書真不  
媿血性男子矣

楊升庵成滇日以詩相唱和者有楊門七子中以張禹山舍爲  
最其贈升庵云八千里外潮陽馬十九年來海上羝又樓頭艷  
曲包明月海上新銘蔡少霞公撰有海碑記皆渾成工切